

Inatsisartut Naalakkersuisullu pillugit Inatsisartut inatsisaat pillugu Namminersorlutik Oqartussat nalunaarutaat

Matumuuna Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersoq, Inatsisartut inatsisaat nr. 12, 29. november 2013-meersoq, Inatsisartut inatsisaat nr. 30, 9. december 2015-meersoq, Inatsisartut inatsisaat, nr. 2, 29. maj 2020-meersumi kingunerisaanik allannguutit ilanngullugit nalunaarutigineqarpoq.

Kapitali 1

Namminersorlutik Oqartussat

§ 1. Kalaallit Nunaanni Namminersorlutik Oqartussat suliaasaqarfiit tigusatik pillugit inatsisiliortutut atuutsitsinissamullu pissaaneqarput. Eqqartuussiviit, Namminersorlutik Oqartussat pilersitaat Kalaallit Nunaanni suliaasaqarfinnut tamanut eqqartuussivittut pissaaneqarput. Tamanna naapertorlugu inatsisiliorneq Inatsisartuniippoq, atuutsitsineq Naalakkersuisuniilluni eqqartuussivittullu pissaaneq eqqartuussivinniilluni.

Kapitali 2

Inatsisiliortutut pissaaneq

§ 2. Inatsisartut nalinginnaasumik, toqqaannartumik isertortumillu qinersinikkut ukiunut sisamanut qinerneqartunik 31-inik ilaasortaqrput. Nutaamik qinersisoqarsimatinagu qanorluunniit pisoqaraluarpat ilaasortaaffiit annaaneqarsinnaanngillat.

Imm. 2. Inatsisartunut qinersinermut maleruagassat immikkut Inatsisartut inatsisaatigut aalajangersarneqassapput.

§ 3. Ilaasortat qinigaanerisa atuuttuussusiat kiisalu ilaasortaq qanoq qinigaasinnaassusiagaasinnaanersoq pillugu apeqqut Inatsisartut nammineerlutik aalajangigassaraat.

Imm. 2. Inatsisartunut ilaasortap qinigaasinnaassusiagaasinnaavoq, pisumi inuup nalinginnaasumik isigineqarnermini Inatsisartunut ilaasortaanermini ataqqinaataaruppat inaarutaasumik eqqartuussummik akiliisinnermilluunniit akuersissuteqarnermik pinerluttulerinermi inatsisit tunngavigalugit pineqaatissinneqarsimaguni.

§ 4. Inatsisartunut ilaasortaaneq inuiaqatigiinnit toqqagaanikkut suliassiissutitut pisussaaffuvoq.

Imm. 2. Inatsisartunut ilaasortaq tunuarniuteqarpat imaluunniit sulinngiffeqarnissamik akuerineqagquppat qinnuteqarneq akuerineqarsinnaanersoq Inatsisartut aalajangissavaat.

§ 5. Inatsisartut innimiginarluinnartussaapput.

Imm. 2. Inatsisartunut ilaasortat sulinerminni namminneq nalunngeqatiginnissusertik kisiat tungavigissavaat.

Imm. 3. Inatsisartut suleriaasertik nammineerlutik aalajangersassavaat.

§ 6. Inatsisartunut ilaasortaq kinaluunniit Inatsisartuni nammineq oqaaserisaminut Inatsisartut avataanni Inatsisartut akuerinngisaannik akisussaatinneqarsinnaanngilaq.

Imm. 2. Inatsisartunut ilaasortaq kinaluunniit, iliuuseqarnermini pakasarneqarsimanngippat, Inatsisartut akuersisimatinnagit unnerluutigineqarsinnaananilu qanorluunniit ittumik kiffaanngissusiarneqarsinnaanngilaq.

§ 7. Inatsisartut nutaamik qinersinerup kingornatigut sapinngisamik piaartumik kingusinnerpaamillu ullut 45-t qaangiutsinnagit katersuutissapput. Ataatsimiigiaqqusisuusaaq ilaasortaq sivisunerpaamik Inatsisartunut ilaasortaasoq imaluunniit ilaasortat arlallit sivisoqatigiimmik ilaasortaasimappata angajulleq. Qinigaanerup nalilerneqarnissaata aammalu Inatsisartut Siulittaasoqarfiannik qinersisoqarnissaata tungaanut ilaasortap taassuma Inatsisartut ataatsimiinneri aqussavai.

§ 8. Inatsisartut aalajangiisinnaassuseqarput ikinnerpaamik ilaasortat affaat najuuppata. Aalajangiisoqartarpoq aalajangiineq taasisunit ilaasortat najuuttut affaannit amerlanerusunit taperseerineqarpat.

§ 9. Inatsisartuni ataatsimiinnerit tamanut ammasuupput. Taamaattorli Inatsisartut isumaqatigiissutigisinnaavaat suliassat ataasiakkaat matoqqasumik ataatsimiinnermi oqaluuserineqarnissaat. Suliassap matoqqasumik ataatsimiissutigisariaqarneranik apeqqut matoqqasumik ataatsimiinnermi isumaqatiginninniutaassaaq, taamaaliornissaq Inatsisartunit imaluunniit ataatsimiinnermi aqutsisumit aalajangerneqarpat.

Imm. 2. Inatsisartuni isumaqatiginninniarnit kalaallisut ingerlanneqassapput. Inatsisartunut Naalakkersuisunullu ilaasortat kalaallit oqaasiinik atuinngitsut danskisut oqalussinnaatitaapput, oqaasiilu kalaallisuumut nutserneqassallutik taamatuttaarlu isumaqatigiinniarnit danskisut aamma malinnaaffigineqarsinnaassallutik.

Imm. 3. Inatsisartut isumaqatiginninniutaat taakkunungalut ilanngussat tamanut saqqummiunneqartassapput kalaallisut danskisullu.

Imm. 4. Naalagaaffiup Sinniisaa Inatsisartut tamanut ammasumik ataatsimiinnerini najuuffiginninnissamik pisinnaatitaavoq.

§ 10. Inatsisartut katersuuttassapput Inatsisartut siulittaasuata pisariaqartitsisorineratut akulikitsigisunik, taamatullu aamma katersuuttassallutik Naalakkersuisut siulittaasuata imaluunniit Inatsisartunut ilaasortat ikinnerpaamik affaasa tamanna piumasarigaangassuk.

Imm. 2. Inatsisartut ileqquusumik katersuunnermi aalajangissavaat Inatsisartut tullianik ileq-quusumik katersuunnissaannut piffissaq ataatsimiiffiusussaq.

§ 11. Inatsisartut Siulittaasoqarfiata ataatsimiinnissaq sioqqullugu Inatsisartut ilaasortaannut, Naalakkersuisunut Naalagaaffullu Sinniisuanut oqaluuserineqartussatut naatsorsuutigineqartut nalunaarsorneri nassiutissavai. Nalunaarsuutit tamanut saqqummiunneqassapput.

§ 12. Inatsisartunut ilaasortaq pisortat suliassaataat pillugu paasissutissinneqarnissaminik kissaateqarpat, tamanna Naalakkersuisunut apeqquteqarnikkut pisinnaavoq.

Imm. 2. Naalakkersuisut apeqqummut akissuteqarnissaminnut pisussaafeqanngillat:

- 1) Naalakkersuisut paasissutissanik akissuteqarnissaminnut atugassaminik pissarsisinnaanngippata,
- 2) malunnartumik piffissaq nukissallu paasissutissanik akissuteqarnissamut atugassanik pissarsiniarnermut atortariaqassappata, imaluunniit
- 3) paasissutissat kissaatigineqartut nipangiussisussaataitanermut ilaatinneqarpata.

§ 13. Inatsisartut inatsisissaattut, inatsisartut peqqussutissaattut aalajangiiffigisassanillu allanik siunnersuutininik Inatsisartunut Naalakkersuisunullu ilaasortaq kinaluunniit saqqummiussisinnaavoq.

Imm. 2. Kalaallit Nunaannut sunniutilinnik inatsisissatut naalagaaffilluunniit isumaqatigiissutissaattut danskit naalakkersuisuisa siunnersuutaat Inatsisartut aalajangiiffigisassaattut siunnersuutitut Naalakkersuisunit saqqummiunneqartassapput.

§ 14. Inatsisartut inatsisissaattut siunnersuutit inatsisitut ilusilerlugit saqqummiunneqassapput Inatsisartunilu pingasoriarlugit suliarineqassallutik.

§ 15. Naalakkersuisut ukiumi ukioq aningaasanut inatsiseqarfiusoq sioqqullugu kingusinnerpaamik novembarip ulluisa 15-ianni inaarutaasumik akuersissuteqarnissaq siunertaralugu ukiumut aningaasanut inatsiseqarfiusumut tulluuttumut Inatsisartut aningaasanut inatsisissaattut siunnersuut saqqummiutissavaat.

§ 16. Inatsisartut Aningaasaqarnermut Ataatsimiititaliaat Naalakkersuisut aningaasanut inatsisissatut siunnersuutaata siullermeerlugu aappassaaneerlugulu oqaluuserineqarnerata akornanni nunap karsianut missingersuutitut siunnersuutit pillugit isumaliutissiissuteqassaaq, Inatsisartut isertitanut- aamma aningaasartuutitut politikkikkut ingerlatsinerannut najoqqutassianut pingaarnernut oqaaseqarfiginnillunilu siunnersuuteqassalluni kiisalu suliassani Inatsisartunit Naalakkersuisunilluunniit ataatsimiititaliamut innersuunneqarsimasuni Inatsisartut sinnerlugit oqaaseqartassalluni.

Imm. 2. Inatsisartut Aningaasaqarnermut Ataatsimiititaliaata siunertanut aningaasartuutaasussat aningaasanut inatsisip akuersissutigineqarnerani siumut naatsorsuutigineqarsimanngitsut Inatsisartut sinnerlugit akuersissutigisinnaavai. Tamanna pillugu Inatsisartunut Inatsisartullu Ombudsmandianut aningaasartuutaasussat siunertanut aningaasanut inatsisip akuersissutigineqarnerani siumut naatsorsuutigineqarsimanngitsunut tunngatillugu aningaasartuutaasussat Inatsisartut sinnerlugit Suleriaaseq pillugu Ataatsimiititaliamit akuersissutigineqarsinnaapput, inatsisartut ataatsimiinginneranni.

Imm. 3. Inatsisartut Aningaasaqarnermut Ataatsimiititaliaata aningaasartuutissatut akuersissutai

ukiumoortumik ilassutitut aningaasaliissutitut inatsimmi, ukiumi aningaasanut inatsiseqarfusumi tulluuttumi Inatsisartut ileqquusumik siullermeerlutik ataatsimiinneranni oqaluuserineqartussami, katersorneqassapput.

Imm. 4. Naalakkersuisut aningaasanut inatsisip suliarinerani missingersuusiordermi maleruagassanik malittarisassat aalajangersassavaat.

§ 17. Aktiaateqarluni ingerlatseqatigiiffinni Namminersorlutik Oqartussanit tamakkiisumik ilaannakuusumilluunniit pigineqartuni aningaasaliinissamik qularnaveeqqusiinissamilluunniit allatulluunniit aningaasatigut iluaqusiinissamik pingaarutilinnik siunnersuutini qinnuteqaatinilluunniit ataatsimiititaliap suliarinninnerani atugassatut ingerlatseqatigiiffimmit pineqartumit, pisariaqarpat aktiaateqarluni ingerlatseqatigiiffiit pillugit inatsimmi ingerlatseqatigiiffilluunniit malittarisassaanni periarfissiisutaasut atornerisigut, paasissutissanik erseqqinnerusumik nalunaakkanik pissarsiniarissamik Inatsisartut Aningaasaqarnermut Ataatsimiititaliaata Naalakkersuisut peqqusinnaavai. Ataatsimiititaliap kaammattuineratigut paasissutissat Naalakkersuisut pissarsiatik kinguarsaanertaqanngitsumik ataatsimiititaliamut atugassanngortissavaat.

Imm. 2. Paasissutissat ataatsimiititaliamit pisariaqartutut nalilernerqartut tigunissaasa tungaanut siunnersuutini qinnuteqaatinilluunniit imm. 1-imi taaneqartunik suliarinninnini ataatsimiititaliap unitsikkallarsinnaavaa.

Imm. 3. Paasissutissat isertuussassatut tunniunneqarsimappata ataatsimiititaliami ilaasortat allallu ataatsimiititaliap oqaluuserinninnerani najuuttut imm. 1 naapertorlugu ataatsimiititaliami ilisimalikkaminnik isertuussinissaminnut pisussaataapput. Nutaatut ilaasortanngortoq kinaluunniit pisussaaffimmik tamatuminnga eqquutsitsinissamik uppersaalluni atsiusaaq.

§ 18. Nunap karsiata Naatsorsuutaasa Kukkunersiorneqartarnerannut Ataatsimiititaliap nunap karsiata naatsorsuutai kukkunersuiisullu taakkununga oqaaseqaataat ukiumut ataasiarluni misissortassavai, naatsorsuutillu pisariaqalersitaannik Naalakkersuisunut apeqquteqarlunilu oqaaseqarfiginnittassalluni. Apeqqutit oqaaseqaatillu Naalakkersuisut akissutaat ilanngullugit Inatsisartunut saqqummiunneqassapput.

Imm. 2. Ataatsimiititaliap nalilersinnaavaa suliffeqarfiit imm. 1 malillugu kukkunersuinermit ilaasut aningaasaataasa aquunneqarneranni suliffeqarfillu ingerlanneqarneranni aningaasanut tunngasut naapertuuttumik isiginiarneqarsimanersut. Nassuiaatit, nalunaarutit il.il. nalilersuinermit atugassatut suliarineqarsimasut tiguneqarnermik kinguninngua ilisimatitsissutitut Naalakkersuisunut nassiuunneqassapput.

Imm. 3. Ataatsimiititaliap suliaminut atugassatut atortussat pisariaqartut, naatsorsuutitut uppersaataat, nalunaarusiat il.il. oqartussamit naatsorsuuserisumit piniarsinnaavai. Ataatsimiititaliamut ilaasortat arlaata kissaatigippagu paasissutissat taaneqartut ataatsimiititaliamit piniarneqassapput.

§ 19. Namminersorlutik Oqartussat aktiaatilittut soqutiginninnera Naalakkersuisut qanoq isumaginninnerannik Nunap karsiata Naatsorsuutaasa Kukkunersiorneqartarnerannut Ataatsimiititaliaq aamma nakkutilliisuvoq.

Imm. 2. Aktiaateqarluni ingerlatseqatigiiffiit Namminersorlutik Oqartussanit tamakkiisumik ilaannakuusumilluunniit pigineqartut ingerlanneqarneranni aningaasaqarnikkut innimigissanik

Naalakkersuisut naammattumik annertussuseqartumik qulakkeerinninniarsimanersut ataatsimiititaliap imm. 1 naapertorlugu nakkutilliinermi ilaatillugu nalilersorsinnaavaa.

Imm. 3. Aktiaateqarluni ingerlatseqatigiiffinni Namminersorlutik Oqartussanit tamakkiisumik ilaannakuusumilluunniit pigineqartuni Namminersorlutik Oqartussat aktiaatilittut soqutigisaannik ataatsimiititaliap nakkutilliinermi atugassatut ingerlatseqatigiiffimmit, pisariaqarpat aktiaateqarluni ingerlatseqatigiiffiit pillugit inatsimmi ingerlatseqatigiiffiilluunniit malittarisassaani periarfissiisutaasut atornerisigut, paasissutissanik erseqqinnerusumik nalunaakkanik pissarsiniarnissamik Naalakkersuisut peqqusinnaavai. Ataatsimiititaliap kaammattuineratigut paasissutissat Naalakkersuisut pissarsiatik kinguarsaanertaqanngitsumik ataatsimiititaliamut atugassiisutigissavaat.

Imm. 4. Ataatsimiititaliami ilaasortaq kinaluunniit aalajangiiffisassatut siunnersuummik Inatsisartut aalajangiiffisassaannik imm. 2-3-lu naapertorlugit saqqummiussinnaavoq. Inatsisartunut ilaasortat ikinnerpaamik 2/5-liisa siunnersuut isumaqatigalugu taasippata siunnersuut akuersissutigineqartut isigineqassaaq. Siunnersuummut allannguutissatut siunnersuummik saqqummiussisoqarsinnaanngilaq.

Imm. 5. Paasissutissat isertuussassatut tunniunneqarsimappata ataatsimiititaliami ilaasortat allallu ataatsimiititaliap oqaluuserinninnerani najuuttut imm. 1 naapertorlugu ataatsimiititaliami ilisimalikkaminnik isertuussinissaminnut pisussaataapput. Nutaatut ilaasortanngortoq kinaluunniit pisussaaffimmik eqquutsisinissamik uppernarsaalluni atsiussaaq. Pissutsinik Namminersorlutik Oqartussat aktiaatilittut soqutigisaannut tunngasunik Inatsisartut ilisimatitsissuteqarfigineqarnissat ataatsimiititaliap pisariaqartut isigiguniuk ataatsimiititaliaq immikkuullarissumik isumaliutissiisuteqassaaq. Isumaliutissiisut paasissutissanik isertuussassanik imaqarpat matoqqasumik ataatsimiinnermi suliarineqassaaq.

§ 20. Inatsisartut Ombudsmandimik qinersisassapput Inatsisartut sinnerlugit Namminersorlutik Oqartussat kommunillu ingerlatsinerannik malinnaasussamik. Ombudsmandi inatsisartunut ilaasortaasinnaanngilaq inatsisilerituutullu ilinniarsimasuussalluni.

Imm. 2. Ombudsmandi Inatsisartunit tatigineqarunnaarpat Inatsisartut soraarsissinnaavaat.

Imm. 3. Ombudsmandip sulinera Inatsisartut Inatsisit Atortinneqarnerannut Ataatsimiititaliaata ingerlaavartumik malinnaavigissavaa. Ombudsmandi ingerlatani pillugit ukiumoortumik nalunaarummik Inatsisartunut saqqummiussisassaaq.

Imm. 4. Ombudsmandip pissutsit atugarisai erseqqinnerusut immikkut Inatsisartut inatsisaatigut aalajangersarneqassapput.

Kapitali 3

Nunanut allanut sillimaniarnermullu tunngasut

§ 21. Inatsisartut Nunanut Allanut Sillimaniarnermullu Ataatsimiititaliaata nunanut allanut sillimaniarnermullu pissutsit Naalakkersuisuneersut suliasarai taakkunungalugu attuumassuteqartunut sammisamut apeqquteqarsinnaallunilu oqaaseqaateqarsinnaavoq. Ataatsimiititaliap suliasaqarfimmini ineriartornermut malinnaalluarnissani pisussaaffigaa.

Imm. 2. Nunanut Allanut Sillimaniarnermullu Ataatsimiititaliami ilaasortat allallu ataatsimiititaliami oqallittoqarnerani peqataasimasut paasissutissanik ataatsimiititaliami paasineqarlutik paasissutissanik isertuussanik danskit naalakkersuisuinit Naalakkersuisuniillu tunniunneqartunik aammalu

ataatsimiititaliap siulittaasuata tamakku saniatigut aalajangigaanut isertuussinissamik pisussaaffeqarput. Kinaluunniit ilaasortaq nutaaq aalajangersagaq taanna malinniarlugu inatsisinik malinninniarluni allakkatigut uppersaalluni atsiortinneqassaaq.

Kapitali 4

Atuutsitsisutut pissaaneq

§ 22. Naalakkersuisunut ilaasortat Inatsisartunit taakku qinigaaffiannut atuuttumik qinerneqassapput.

Imm. 2. Naalakkersuisut siulittaasuata Inatsisartunit ilaasortat akornannit qinerneqassaaq.

Imm. 3. Naalakkersuisut siulittaasuata Naalakkersuisunut ilaasortanik qinigassanik amerlassusilikkaniq aqqisigut taasanik Inatsisartunit inassuteqassaaq. Naalakkersuisunut ilaasortassanik qinersineqassaaq siulittaasup siunnersuutaa ataatsimut taasissutigineratigut.

Imm. 4. Naalakkersuisunut ilaasortaq Inatsisartunit ilaasortaanngitsoq Inatsisartunit qinigaasinnaaneq pillugu aalajangersakkanik sukkulluunniit atuuttunik eqquutsitsissaaq.

Imm. 5. Naalakkersuisunutilaasortaneq inuiaqatigiinnit toqqagaanikkut suliassiissutitut pisussaaffiuvoq.

Imm. 6. Naalakkersuisunut ilaasortat ataasiakkaat akisussaatinneqartarnerat Inatsisartut inatsisaatigut immikkut aalajangersarneqassaaq.

§ 23. Naalakkersuisut siulittaasuata Naalakkersuisunut ilaasortat akornanni Naalakkersuisut suliassaqqarfii agguataassavai.

Imm. 2. Naalakkersuisut siulittaasuata Inatsisartunit nalunaaruteqarnermigut Naalakkersuisunut ilaasortaq qinikkatut atuuffianit atuukkunnaarsissinnaavaa, § 27, imm.1 naapertorlugu ilaasortap Inatsisartunit atuukkunnaarsinneqarneratulli sunniuteqartumik.

§ 24. Naalakkersuisunut ilaasortaq peqqiilliornerminik assigisaanilluunniit pingaarutilimmik pissuteqarluni sulingiffeqartitaanissaminik qinnuteqaateqarpat Naalakkersuisut siulittaasuata qinnuteqaat akuerineqarsinnaanersoq aalajangissavaa.

Imm. 2. Naalakkersuisunut ilaasortaq naalakkersuisunit tunuarniuteqarluni qinnuteqarpat Inatsisartut qinnuteqaat akuerineqarsinnaanersoq aalajangissavaa.

Kapitali 5

Atuuffinnik allanik tigummisaqarneq

§ 25. Inatsisartut siulittaasuata, Naalakkersuisut siulittaasuata Naalakkersuisuniluunniit ilaasortaq ivertinneqarnermi nalaani allanik atuuffeqartuq inuussutissarsiuteqartorluunniit taakkunannga tunuassaaq.

Imm. 2. Inatsisartut siulittaasuata, Naalakkersuisut siulittaasuata Naalakkersuisuniluunniit ilaasortap atuuffiit inuussutissarsiutilluunniit taakku ingerlatiinnarumallugit kissaatigippagu Qinersinerup Misilinneqarnissanut Ataatsimiititaliaq tamanna pillugu erngerluni nalunaarfigissavaa. Nalunaarutip tigneraniit sapaatip akunneri pingasut qaangiutinnginnerini pineqartup atuuffimminik inuussutissarsiumminilluunniit taamaattunik ingerlatsiinnarnissaa ataatsimiititaliap itigartissutigisinnavaa.

Imm. 3. Inatsisartut siulittaasuata imm. 2-mi piffissaliussap naanerata kingorna atuuffiit inuussutissarsiutilluunniit sorliit siulittaasup ingerlatiinnarsinnaanera Inatsisartunut nalunaarutigissavai. Naalakkersuisut siulittaasuata atuuffiit inuussutissarsiutilluunniit sorliit Naalakkersuisut siulittaasuata Naalakkersuisunullu ilaasortat ingerlatiinnarsinnaaneraat Inatsisartut siulittaasuannut nalunaarutigissavaa.

Imm. 4. Inatsisartut siulittaasuat, Naalakkersuisut siulittaasuat Naalakkersuisunilu ilaasortat atuuffinnik inuussutissarsiutinilluunniit pineqartunik ingerlatsinermik saniatigut atuuffinnik inuussutissarsiutinilluunniit nutaanik Qinersinerup Misilinneqarnissaanut Ataatsimiititaliaq akuersereersimatinnagu tiguseqqusaanngillat.

Kapitali 6

Inatsisartunut nutaamik qinersineq aamma Naalakkersuisunik atuukkunnaarsitsineq

§ 26. Naalakkersuisut siulittaasuat piffissap qinigaaffiup atuuffiata naannginnerani Inatsisartunut nutaamik qinersinissamik nalunaaruteqassaaq.

§ 27. Naalakkersuisut siulittaasuat imaluunniit Naalakkersuisunut ilaasortat ataasiakkaat Inatsisartunit tatigineqarunnaarpata Naalakkersuisut Inatsisartunit atuukkunnaarsinneqarsinnaapput.

Imm. 2. Naalakkersuisut siulittaasuat atuukkunnaarsinneqarpat Naalakkersuisut ataatsimoorlutik atuukkunnaassapput.

§ 28. Naalakkersuisut siulittaasuat § 27 naapertorlugu Naalakkersuisunut ilaasortamik imaluunniit Naalakkersuisunik tamarmiusunik Inatsisartut atuukkunnaarsitsisimappata Inatsisartunut nutaamik qinersisoqassasoq ingerlaannartumik nalunaaruteqarsinnaavoq.

§ 29. Naalakkersuisut atuukkunnaarsinneqarpat imaluunniit soraarnissaq qinnutigippassuk imaluunniit nutaamik qinersinissaq nalunaarutigineqarpat, Naalakkersuisut nutaat qinerneqarnissaasa tungaanut Naalakkersuisut atuukkallassapput. Naalakkersuisuugallartut atorfimmi suliaasat ingerlaannarnissaannut pisariaqartunik taamaallaat suliaqarsinnaapput.

Kapitali 7

Inatsisartut inatsisaasa il.il. atuuttutut atsiorneqartarnerat atuutilersinneqartarnerallu

§ 30. Inatsisartut inatsisissaattut siunnersuut akuersissutigineqarteq atuutilersinnaassaguni inaarutaasumik akuersissutigineqarnermi kingorna kingusinnerpaamik sapaatit akunneri sisamat qaangiutsinnagit Naalakkersuisut siulittaasuannit atuuttutut atsiorneqarsimassaaq.

Imm. 2. Siunnersuutip ataatsimiinnermi tullermi Inatsisartunit akuersissutigineqarnissaata tungaanut siunnersuutip inaarutaasumik akuersissutigineqarnerata kingorna ullut arfineq-pingasut ingerlaneranni Naalakkersuisut aalajangersinnaavaat atuuttutut atsiorneqarnissaa kinguartinneqassasoq. Ataatsimiinnermi maani siunnersuut allannguuteqartinnagu akuerineqarpat atorunnaassaaq.

Imm. 3. Aningaasaliissutitut inatsisaagallartumik imaluunniit nutaamik qinersisoqarnis-saanik inatsimmik atuuttutut atsiuinissaq Naalakkersuisut kinguartissinnaanngilaat.

§ 31. Inatsisartunit inatsisit Namminersorlutillu Oqartussat nalunaarutaat allamik aalajangiisoqarsimangippat atuutilertarput Inatsisartunit inatsisip Namminersorlutilluunniit Oqartussat nalunaarutaasa ulloq taanna atuutilersutut nalunaarsimanerata kingorna ulloq aallartikkaangat.

Imm. 2. Tamanut saqqummiussineq qarasaasiat atorlugit pisassaaq. Naalakkersuisut tamanut saqqummiussisarnermut maleruagassanik aalajangersaassapput.

Imm. 3. Inatsisartut inatsisaat, Inatsisartut peqqussutaat imaluunniit Namminersorlutik Oqartussat nalunaarutaat tunngavigalugit kommunit maleruagqusaliaannut tunngatillugu imm. 1 aamma 2 taamatuttaaq atuupput.

Kapitali 8

Atuutilerfia

§ 32. Inatsisartut inatsisaat manna 1. december 2010-mi atortuulerpoq. Inatsisartut Naalakkersuisullu pillugit Inatsisartut inatsisaat nr. 11, 20. oktober 1988-imeersoq tamatumunnga peqatigitillugu atuukkunnaarsinneqarpoq.

Imm. 2. Inatsisartut Naalakkersuisullu pillugit Inatsisartut inatsisaat nr. 11, 20. oktober 1988-imeersoq tunngavigalugu malittarisassatut aalajangersarneqartut malittarisassanit Inatsisartut inatsisaat manna tunngavigalugu aalajangersarneqartunit taarserneqarnissamik atorunnaarsinneqarnissamilluunniit tungaanut atuutissapput.

Inatsisartut inatsisaat nr. 12, 29. november 2013-meersoq (Qarasaasiat atorlugit tamanut saqqummiisarneq)[\[1\]](#) atuutsitsilernissamut aalajangersaq una imaraa:

§ 2

Inatsisartut inatsisaat manna 1. januar 2014 atuutilissaaq.

Inatsisartut inatsisaat nr. 30, 9. december 2015-imeersoq (§ 25, imm. 3-p, aamma § 31, imm. 1-ip kalaallisoortaani inatsisip allassimanerata naqqinneqarnera)[\[2\]](#) atuutsitsilernissamut aalajangersaq una imaraa:

§ 2

Inatsisartut inatsisaat januaarip 1.-ni 2016-imi atuutilissaaq.

Inatsisartut inatsisaat, nr. 2, 29. maj 2020-meersoq (Naalakkersuisunut apeqqutit)[\[3\]](#) atuutsitsilernissamut aalajangersaq una imaraa:

§ 2

Inatsisartut inatsisaat ulloq 1. juli 2020 atuutilissaaq.

Naalakkersuisut Siulittaasuata Naalakkersuisoqarfia, ulloq 21. aprili 2021

Hans-Peder Barlach Christensen

/

Jógvan Svabo Samuelsen

[\[1\]](#) Inatsimmi allanngortinneqartumi pineqarput § 31.

[\[2\]](#) Inatsimmi allanngortinneqartumi pineqarput § 25, imm. 3 aamma § 31, imm. 1.

[\[3\]](#) Inatsimmi allanngortinneqartumi pineqarput § 12.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

